

# Liedjies vir Voorslag - 2018

## #VoortrekkersKAN lekker sing

---

### *LIED 59 – TANT HESSIE SE WITPERD*

Kyk, hoe ry tant Hessie se witperd, Hessie se witperd, Hessie se witperd.  
Kyk, hoe ry tant Hessie se witperd ; Hessie se witperd bo!  
Julle maak verniet tant Hessie se witperd sleg;  
Tant Hessie se witperd maak die hele wêreld reg.  
O, kyk, hoe ry tant Hessie se witperd, Hessie se witperd, Hessie se witperd.  
Kyk, hoe ry tant Hessie se witperd; Hessie se witperd bo!

### *LIED 58 – EK SOEK NA MY DINA*

Ek soek na my Dina, my Dina, my Dina;  
Ek soek na my Dina, die Dina van my.  
O, hier is my Dina, my Dina, my Dina;  
O, hier is my Dina, die Dina van my.

Ek soek 'n lemoentjie, en toe 'n pampoentjie –  
Presentjie vir Dina – en kon dit nie kry.  
“Laat staan wat daar ver is: daar’s nader en  
beter,  
Gee dié maar,” sê Dina, “gee dié maar vir my.”

Ek soek 'n jangroentjie, 'n pêrellemoentjie –  
presentjie vir Dina – en kon dit nie kry.  
“Laat staan wat so skaars is; daar's volop en  
beter;  
Gee dié maar,” sê Dina, “gee dié maar vir my.”

Pampoentjie, jangroentjie en pêrellemoentjie  
Wat is daar op aarde dan beter te kry?  
En toe kom 'n ander en gee haar 'n soentjie –  
En nooit meer 'n Dina, 'n Dina vir my.

### *LIED 37 – DIS 'N LAND*

Daar's 'n land aan suiderkant, kom deel in sy verhale.  
Uit die ooste, weste, noorde, suide toegebring  
Dis 'n land met wilde hand wat uitreik telkemale.  
Om die hoop van môre te besing.

Dis 'n land van kleure en klank  
Dis 'n land van oorfloed en dank  
Dis 'n land waar almal na strewe  
Dis 'n land sonder horison en -  
Dis 'n land wat weet hy kan  
Ook 'n blyplek neerlê vir my  
Watter man wat sy kind verstaan  
Sal hom verlaat om alleen op sy weg te gaan  
Hierdie land bied almal 'n lewe.  
Watter vrou sal haar kind vermaan  
As daar vir hom ook 'n plek in die son bestaan  
Hierdie land bied almal sy deel.

Daar's 'n land wat nooit verpand sy kosbaarste besitting  
Vele mense, volke, wat sy lewensdraad sal bly  
Dis 'n land wat koers kan hou, gee jy maar net die rigting:  
Baan die môre ook vir jou en my –

Dis 'n land van kleure en klank  
Dis 'n land van oorfloed en dank  
Dis 'n land waar almal na strewe  
Dis 'n land sonder horison en  
Dis 'n land wat weet hy kan  
Ook 'n blyplek neerlê vir my  
Watter man wat sy kind verstaan  
Sal hom verlaat om alleen op sy weg te gaan  
Hierdie land bied almal 'n lewe.  
Watter vrou sal haar kind vermaan  
As daar vir hom ook 'n plek in die son bestaan  
Hierdie land bied almal sy deel.

### *LIED 15 – VLAGLIED*

Nooit hoef jou kinders wat trou is te vra:  
Wat beteken jou vlag dan Suid-Afrika?  
Ons weet hy's die seël van ons vryheid en reg  
Vir naaste en vreemde, vir oorman en kneg;  
Die pand van ons erfnis, geslag op geslag,  
Om te hou vir ons kinders se kinders wat wag.  
Ons nasie se grondbrief van eiendomsland,  
Uitgegee op gesag van die Hoogste se hand.  
Oor ons hoof sal ons hys, in ons hart sal ons dra,  
Die vlag van ons eie Suid-Afrika.

### *LIED 20 – DIERBAAR SUID-AFRIKA*

Land van die vaders, land van vrome Trekkers,  
Jy is ons dure pand, ons geliefde Vaderland.  
Jou dien met al ons vlyt! Jou beskerm in sware stryd!  
Dierbaar Suid-Afrika.

Gee ons die manne, rein in hul wandel.  
Manne met Trekkersbloed, trou in al hul handel.  
Dan is ons onbevrees, sal ons toekoms veilig wees  
Dierbaar Suid-Afrika.

Gee ons die vroue, eerbaar in hul wandel.  
Vroue met Trekkersmoed, rein in al hul handel.  
Dan bly ons roem bewaar, dan ook bly ons volk gespaar.  
Dierbaar Suid-Afrika.

### *LIED 64 - HEERLIK IS DIE TREKKERSLEWE*

Heerlik is die Trekkerslewe waarlik ja! O ja!  
Vry te lewe, hoog te strewe waarlik ja! O ja!  
Heerlik as die tente staan ver in die berge  
opgeslaan,  
Waarlik, waarlik, waarlik, waarlik, waarlik ja!  
O ja!

Heerlik in die veld te lewe waarlik ja! O ja!  
Heerlik strewe, sinvol lewe, waarlik ja! O ja!  
Heerlik as die vuurtjie brand ver in die velde  
van ons land.  
Waarlik, waarlik, waarlik, waarlik, waarlik ja!  
O ja!

### *LIED 89 - DIE VONKE SKIET EN SPRING*

Die vonke skiet en spring, ons vorm nou wyd die Trekkerskring  
en pak nog stompe op, en pak nog stompe op  
so hoog, so hoog,  
So hoog word vonke uitgestrooi en verf die naglug rooi  
En verf die naglug rooi.

'n Swerwer in die veld, hy stap so deur die groen valleie  
En sing sy liedjie bly, en sing sy liedjie bly.  
Ja-ho, tra-la, ja, heerlik is die geure hier,  
Hier in die veld en vlei, hier in die veld en vlei.  
Ja-ho, tra-la, ja, heerlik is die geure hier,  
Hier in die veld en vlei, hier in die veld en vlei.

### *LIED 107 - LOOF DIE HEER, HY IS GOED*

Loof die Heer Hy is goed,  
Loof Sy heilige Naam.  
Laat alles in die groot heelal die Here loof.

Hy't my sonde vergeef  
En Hy maak my Sy kind –  
Laat alles in die groot heelal die Here loof.

Ek wil die Here loof, (ek wil die Here loof)  
Loof met my hele hart. (loof met my hele  
hart)  
Hy gee hul wat roep,  
Weer nuwe krag.

Ek wil die Here loof, (ek wil die Here loof)  
Loof met my hele hart. (loof met my hele  
hart)  
Hy gee hul wat roep,  
Weer nuwe krag.

Loof, o hemel, die Heer,  
al die engele saam –  
Laat alles in die groot heelal die Here loof.

Ek wil die Here loof, (ek wil die Here loof)  
Loof met my hele hart. (loof met my hele hart)  
Hy gee hul wat roep,  
Weer nuwe krag.

## *LIED 109 – VONKK 82 LAAT ONS SKYN VIR JESUS*

Laat ons skyn vir Jesus met 'n helder glans,  
Skitter soos die sterre in die hemel saans.  
In die donker wêreld waar die lig verdwyn,  
Skyn daar met jou liggie al is dit klein.

Laat ons skyn vir Jesus en met blydschap sing –  
So sy liefdesboodskap ook na ander bring.  
Hy help jou en lei jou. Hy stap met jou saam.  
Skyn dan so vir Jesus net waar jy gaan.

Laat ons skyn vir Jesus, dit vra Hy van jou.  
Moenie langer wag nie, doen dit sommer nou.  
Laat ons vir Hom lewe, voluit elke dag.  
Skyn dan so vir Jesus – Hy gee jou krag!

## *LIED 1 – HOU KOERS*

As die lente oor die velde in 'n asem groen ontwaak,  
Leer en speel ons in ons eie word die toekoms oopgemaak.  
Om die kampvuur in die stiltes, weef ons drome in die wind.  
Strek ons uit na horisonne sal die hoop ons saam verbind.

Hou koers! Hou koers!  
Deel die liefde vir ons land.  
Hou koers! Hou koers!  
Pluk die toekoms, vat my hand.

As die son se môreklanke saggies in my oor kom lê,  
Kies my voete wandelpaaie, weet ek wat my siel wil hê.  
Oor die vlaktes, deur die ruimtes, lê my spore ankervas.  
Volg ek bly my volk se roetes met geloof se klein kompas.

Hou koers! Hou koers!  
Deel die liefde vir ons land.  
Hou koers! Hou koers!  
Pluk die toekoms, vat my hand.

As die somer in sy glorie my op tenger halms rig;  
Reik my hand in diepe ootmoed na die sekel van my plig.  
Erf my kennis, leef my vreugde, volg die sterre in hul baan.  
Voel die polsslag van die lewe, loof die Bron van ons bestaan.

Hou koers! Hou koers!  
Deel die liefde vir ons land.  
Hou koers! Hou koers!  
Pluk die toekoms, vat my hand.

## *LIED 67 – WERK! WERK! LEKKER WERK!*

Werk! Werk! Lekker werk! Arbeid adel, werk maak sterk!  
Vele hande, ligte werk, ons is nou-nou klaar ja!  
Reën en wind of brand en ramp, baie kreun en bietjie kramp,  
Hier 'n stoot en daar 'n stamp, kom ons hou 'n spankamp.

Werk! Werk! Lekker werk Arbeid adel, werk maak sterk!  
Vele hande, ligte werk, ons is nou-nou klaar ja!  
Hou die paal vas! Trek die tou!  
Slaan die pen in, gou-gou-gou!  
Tien vir my en tien vir jou:  
Kyk daar staan ons tent nou.

Werk! Werk! Lekker werk! Arbeid adel, werk maak sterk!  
Vele hande, ligte werk, ons is nou-nou klaar ja!  
Hou vergad'ring, praat-praat-praat!  
Smorens vroeg tot sawens laat.  
Kyk hoe sit ons hier en gaap:  
Ons wil nou gaan slaap-slaap!